

आकाशवाणी

खबरां -----

1. प्रधानमंत्री नरेंद्र मोदी होरें अज्ज नमीं दिल्ली दे विज्ञान भवन च 98में अखिल भारती मराठी साहित्य सम्मेलन दा उद्घाटन कीता।
2. प्रधानमंत्री होरें आखेआ जे वैश्विक यक्को-तक्कियें दे हल तुप्पने लेई ते नमें मानदंड स्थापित करने लेई देसै गी उर्जावान लीडरें दी जरूरत ऐ।
3. भूटान दे प्रधानमंत्री होरें आखेआ जे स्कूल ऑफ अल्टीमेट लीडरशिप सम्मेलन सोल प्रधानमंत्री मोदी हुंदे आसेआ खालिस नेतृत्व गी पोषित करने दे धैये गी होर पक्का करदा ऐ।
4. विदेश मंत्री डॉ. एस जयशंकर होरें अज्ज दक्खन अफ्रीका दे जोहानास्वर्ग च अपने चीनी समकक्ष वांग जी हुंदे नै मलाटी लाई।
5. विदेश मंत्रालय नै आखेआ जे अमरीकी अंतरराष्ट्रीय विकास एजेंसी दी वित्तीय सहायता दे बारे च हाल दे बयान चिंता पैदा करदे न।

## PM-Marathi-Sahitya

प्रधानमंत्री नरेंद्र मोदी होरें अज्ज नमीं दिल्ली दे विज्ञान भवन च 98में अखिल भारती मराठी साहित्य सम्मेलन दा उद्घाटन कीता। त्रै दिन दे इस सम्मेलन दौरान पैनल चर्चा, कताबें दी नुमैश, सांस्कृतिक कार्जक्रम ते मन्ने दे साहित्यकारें कन्नै गल्लै-कत्थै आहले सत्रें दी इक बन-सबन्नी श्रृंखला आयोजित कीती जाग। एहदे च मराठी साहित्य दी प्रसांगिकता पर चर्चा होग ते समकालीन विमर्श च एहदी भूमिका बारै विचार कीता जाग जेदे च भाषा संरक्षण अनुवाद ते साहित्यक कम्में पर डिजिटलीकरण दे प्रभाव जनेह विशे शामिल होंगन।



## PM-Soul

प्रधानमंत्री नरेन्द्र मोदी होरें अज्ज नमी दिल्ली दे भारत मंडपम च स्कूल ऑफ अल्टीमेट लीडरशिप-सोल कॉन्क्लेव दे पैहले संस्करण दा उद्घाटन कीता। भूटान दे प्रधानमंत्री दशो त्सरिंग टोबगे होरें इस मौके पर मुख भाषण दिता। उनें भारत सरकार दे केंई सारे जतनें गी उजागर कीता जिन्दे च पीएम आवास योजना, जल जीवन मिशन ते पीएम गति शक्ति योजना शामिल ऐ। इस मौके पर बोलदे होई प्रधानमंत्री होरें आक्खेआ जे भारत इक वैश्विक ऊर्जा दे केन्द्रर दे तौर पर उभरा र दा ऐ। देसे गी हर क्षेत्र च ऊर्जावान नेताएं दी लोड ऐ। प्रधानमंत्री होरें जन से जगत ते व्यक्ति निर्माण से राष्ट्र निर्माण दे मंत्र गी सांझा कीता।

इस मौके पर भूटान के प्रधानमंत्री दशो त्सरिंग टोबगे हों आखेआ जे एह स्कूल ऑफ अल्टीमेट लीडरशिप सम्मेलन प्रधानमंत्री नरेंद्र मोदी हुंदी गै सोच ऐ। दऊं दिनें के सोल लीडरशिप कन्क्लेव इक प्रमुख मंच के रूपै च कमम करंगन जित्थे राजनीति, खेड्ड, कला ते मीडिया, अध्यात्म, सार्वजनिक नीति, व्यवसाय ते समाजी खेत्तर जनेह बक्ख-बक्ख खेत्तरें के लोक अपनी प्रेरणादायक जीवन जात्तरा सांझिया करंगन। स्कूल ऑफ अल्टीमेटम लीडरशिप गुजरात च इक नेतृत्व संस्था ऐ जेदा मकसद रस्मी तौर पर सिखलाई के माध्यम कन्नै भारत च सियासी नेतृत्व के मंजर गी व्यापक बनाना ऐ।



### Shah-Wrestling Council

गृह मंत्री अमित शाह कल महाराष्ट्र के पुणे च पच्छमी खेत्तरीय परिषद की 27मीं बैठक की अध्यक्षता करडन। परिषद च गुजरात, गोवा, महाराष्ट्र ते दादरा नगर हवेली ते दमन-दीव शामिल न। खेत्तरीय परिषद च बुनियादी ढांचे खनन, पर्यावरण, खाद्य सुरक्षा मापदंडें ते खेत्तरीय सतह पर सांझा हितें के दुए विशें कन्नै सरबंधत मुद्दें पर चर्चा होग। प्रधानमंत्री नरेंद्र मोदी हों देसै के पूरे-पराते विकास लेई सहकारी ते मुकाबलेबाजी आहले संघवाद दा लाहू ठोआने की जरूरत पर जोर पाया। खेत्री परिषद दो जां दो थमां मते राज्यें जां केंद्र ते राज्यें गी प्रभावित करने आहले मुद्दें पर लगातार गल्ल-कत्थ लेई इक मंच हासल करोआंदियां न। गृह मंत्री हों राज्यें गी सशक्त करने के केंद्र ते राज्यें मझाटै बेहतर तालमेल लेई सहकारी संघवाद के दृष्टिकोण पर बी जोर पाया ऐ।



## Krishi-Vigyan Mela

कृषि ते करसान कल्याण मंत्री शिवराज सिंह चौहान कल नमीं दिल्ली च त्रै दिन चलने आहले 2025 दे पूसा कृषि विज्ञान मेले दा उद्घाटन करंगन। इस मेले दा विशेषार ऐ-उन्नत कृषि विकसित भारत। मेले दा मुख् आकर्षण भारती कृषि अनुसंधान संस्थान आसेआ विकसित नमिं किस्में ते प्रौद्योगिकिं दा प्रदर्शन होग। एह्दे अलावा भारतीय कृषि अनुसंधान संस्था, कृषि विज्ञान केंद्रें, करसान उत्पादक संगठनें, उद्यमिं ते स्टार्ट अप्स उत्पादें पर प्रदर्शनी बी आयोजित कीती जाग।



## Jaishankar-Chinese

विदेश मंत्री सुब्रह्मण्यम जयशंकर होरें अज्ज दक्खन अफ्रीका दे जोहानास्वर्ग च जी-20 विदेश मंत्रिं दी बैठक थमां बाहरें चीन दे वदेश मंत्री वांग यी हुंदे नै मुलाकात कीती। नमीं दिल्ली च विदेश मंत्रालय दे प्रवक्ता रणधीर जायसवाल होरें दस्सेआ जे दौनें लीडरें दक्खिया सरबंधें च विकास विशेष तौरा पर बन्ने आहले इलाकें च शांति दे प्रबंधन दे बारै च चर्चा कीती। उनें आखेआ जे बैठक च कैलाश मानसरोवर यात्रा लेई सिद्दी हवाई सेवा शुरू करने ते यात्रा सुविधा पर चर्चा कीती गई। विदेश मंत्री होरें आखेआ जे भारत ते चीन नै इक संस्था दे रूपै च जी-20 गी संरक्षित करने लेई बड़ी मती मेहनत कीती ऐ। उनें आखेआ एह् अपने आपै च अंतरराष्ट्रीय सहयोग दे महत्वै गी प्रमाणित करदा ऐ। डॉ.

जयशंकर होरें आखेआ जे भारत ते चीन जी-20 शंघाई सहयोग संगठन एससीओ ते ब्रिक्स दे मिम्बर ना।

<><><><><><>

## Invest-Kerala Summit

प्रधानमंत्री नरेंद्र मोदी 24 फरवरी गी बिहार दे भागलपुर च प्रधानमंत्री किसान सम्मान निधि दी 19मीं किश्त जारी करडन। इस योजना तैहत 3 बरोबर किश्तें च करसानें गी कुदरती करोपिणं कन्नै निब्बडने लेई 6 ज्हार रपे हर बरे दित्ते जंदे ना। अज्ज नमीं दिल्ली च इक संवाददाता सम्मेलन गी संबोधित करदे होई केंद्री कृषि ते करसान कल्याण मंत्री शिवराज सिंह चौहान होरें आखेआ जे मुल्ख भरै दे 2 करोड़ 50 लक्ख करसान इस कार्जक्रम च शामिल होडन। उनें आखेआ जे इस योजना तैहत हूनै तगर कुल 3 लक्ख 46 ज्हार करोड़ रपे जारी कीते जाई चुके देना। श्री चौहान होरें आखेआ जे इस योजना कन्नै लौहके करसानें दे जीवन च इक बड्डा बदलाव आया ऐ।

<><><><><><>

## SC-Appointments

मुख्य न्याधीश संजीव खन्ना हुंदी अध्यक्षता च उच्चतम अदालतै दे Collegiom नै बम्बई उच्च अदालत च 3 बाद्दू स्थायी न्याधीशें दी नियुक्ति दे प्रस्ताव गी मंजूरी देई दित्ती ऐ। कल आयोजित इक बैठक च Collegiom नै स्थायी न्याधीशें दे रूपै च न्यायमूर्ति शैलेश प्रमोद ब्रह्म, फिरदोस फिरोज पूनीवाला ते जितेंद्र शांतिलाल जैन दे नाएं दी मंजूरी दित्ती। इब्बी सिफारिश कीती गई जे बम्बई उच्च अदालतै च बाद्दू न्यायधीश, न्यायमूर्ति

मंजूशा, अजय देशपांडे हुंदे असें गी इक बरे लेई बधाया जाना चाहिदा। Collegiom नै म्रदास उच्च अदालतै च 5एं बादू स्थाई न्यायधीशें गी नियुक्त करने दे प्रस्ताव गी बी मंजूरी दित्ती। इन्दे च न्यायमूर्ति, रामासामी सक्तीवेल पी. धनबल, चिन्नासामी कुमारप्पन ते कंडासामी राजशेकर हुंदे नां शामिल ना।

<><><><><><>

## Vice President Meditation

उपराश्ट्रपति जगदीप धनखड़ होरें आखेआ ऐ जे चिंता ते बेबसी दे रूपै च मानसिक सेहत इक गंभीर चुनौती दे रूपै च उभरे ना। अज्ज नमीं दिल्ली च मेडिटेशन दे वैश्विक सम्मेलन गी संबोधित करदे होई श्री धनखड़ होरें इस आयोजन दी सराहना करदे होई आखेआ जे एह सम्मेलन संयुक्त राश्ट्र दे सतत विकास मिशन दे मुताबक ऐ। उनें आखेआ जे इस सम्मेलन दी प्रासांगिकता वसुधैव कुटुम्बकम् दी प्राचीन परम्परा कन्नै मेल खंदी ऐ।

<><><><><><>

## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किशत होगा। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहगा। एह्दे कन्नो कन्नो एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जागा।

<><><><><><>

## USAID-EAM

विदेश मंत्रालय नै आखेआ ऐ जे अमरीकी अंतरराष्ट्रीय विकास एजेंसी दी वित्तीय सहायता दे बारे च हाल दे बयान चिंता पैदा करने आहले ना। एहू बयान भारत दे अंदरूनी मामलें च वदेश दखलंदाजी दे बारे च चिंता च विशे ना। नमीं दिल्ली च अज्ज दपैहरी मगरा मीडिया आहलें कन्नै गल्ल करदे होई मंत्रालय दे प्रवक्ता रणधीर जायसवाल होरें आखेआ जे सरबंधत विभाग ते एजेंसियां मामले पर बचार करा'रदे ना। उनें एहू जानकारी अमरीका दे राष्ट्रपति डोनाल्ड ट्रम्प हुंदी इस बारै दिती गेदी टिप्पणी मगरा दिती।

<><><><><><>

## EAM-Spokesperson

विदेश मंत्रालय दे प्रवक्ता रणधीर जायसवाल होरें आखेआ ऐ जे भारत देसै च सब्भनें अंतरराष्ट्रीय छात्रें दी सुरक्षा ते कल्याण गी बड़ी मती प्राथमिकता दिंदा ऐ। नमीं दिल्ली च संवाददाताएं गी जानकारी दिंदे होई श्री जायसवाल होरें आखेआ जे नेपाली कुड़ी दी मौती दा मामला सामनै औने मगरा विदेश मंत्रालय ओडिशा सरकार ते K.I.I.T अधिकारिणं कन्नै लगातार संपर्क च ऐ। उनें आखेआ जे मंत्रालय नेपाली अधिकारिणं कन्नै बी संपर्क च ऐ। श्री जायसवाल होरें आखेआ जे ओडिशा पोलीस नै आरोपियें समेत कई गिरफ्तारियां कीतियां न ते उन्दे खिलाफ मामले दर्ज कीते गेना।

<><><><><><>

## Flag-Meeting

भारत ते पाकिस्तान दी सेनाएं बश्कार अज्ज पुंछ जिले च कमांडर सतह दी फ्लैग मीटिंग कीती गई। आकाशवाणी दे जम्मू संवाददाता दी जानकारी मूजब एह मीटिंग पुंछ जिले दे चक्कां दा बाग च नियंत्रण रेखा दे एलओसी क्रासिंग पॉइंट पर होई जेदे च दौनें पक्खें दे वरिष्ठ अधिकारियें हिस्सा लैता। राजौरी-पुंछ ते जम्मू जिलें च हाल च होई दी एलओसी पर गोलीबारी ते आई.ई.डी बिस्फोटें आहली घटनाएं दी पछोक्कड़ै च इस इस मीटिंग दा आयोजन कीता गेआ। दौनें मुलखें दी सेना दे वरिष्ठ अधिकारियें तनाव घट्ट करने दे तरीकें पर चर्चा कीती। इस मीटिंग दा मकसद पाकिस्तानी सेना आसेआ परती-परतियै कीते जाने आहले संघर्ष विराम उल्लंघनें पर चर्चा करना हा। पुंछ दे राहे मिलन च होई दी इस मीटिंग च भारतीय सेना दा प्रतिनिधित्व 93 इंफेंटरी ब्रिगेड दे कमांडर मुदित महाजन होरें कीता।

<><><><><><>

## Speaker

जम्मू-कश्मीर विधानसभा दे स्पीकर अब्दुल रहीम राथर होरें जम्मू च नमें बनाए गेदे विधानसभा परिसर दे निर्माण कम्में दी समीक्षा कीती। बैठक च कई आला अफसर बी मौजूद हे। पीडब्ल्यूडी मैहकमे दे सचिव भूपेंद्र कुमार कानून, न्याय ते पार्लियामानी मामलें दे सचिव अच्छल सेठी ते होरनें मुतलका मैहकमे दे अधिकारियें बैठक च हिस्सा लैता। इस दौरान कई मामलें पर व्यापक विचार-विमर्श कीता गेआ ते एग्जीक्यूटिव इंजीनियर हुंदे आसेआ पावर प्वाइंट प्रेजेंटेशन राहें परियोजनां दे कई चरणें च होई दी

प्रगति बारै दस्सेआ दसाया गेआ। स्पीकर होरें मुतलका एजेंसी गी निर्देश दित्ता जे इस परियोजना दा सारा कम्म तय समें-सीमा दे अंदर-अंदर सबूरा करना यकीनी बनाना।

<><><><><><>

NH

श्रीनगर राष्ट्रीय जरनैली शिडक गड्डिएं दी ओ जाई लेई अज्ज बडले बहाल होई गई। एह शिडक बिनाहल सैक्टर च होई दी बर्फबारी ते मगरा हनी दी तलैट हली स्थिति करी गड्डिएं दी आओ जाई लेई एतियातन बंद करी दिती गई ही। एह शिडक बीरवारें संजा 7 बजे गडडिएं दी जाई लेई बंद करी दिती गई ही। गड्डिएं दी आवा जाई अज्ज बडलै 7 बजे शुरु होई गई। अधिकारिएं मूजब जिया गै मौसम साफ होआ उयां गै शिडक थवा बर्फ गी हटाने लेई मशीनें ते अमले गी लाया गेआ। सब्बनें थवा पैहले बत्ता फसी दी गड्डिएं गी जाने दी उजाजत दिती गई। जम्मू कश्मीर दिएं उच्चिएं धारें पर बुधवारें बर्फबारी होई ते मैदानी इलाकें च बरखा पेई। इस कन्ने प्रदेस च बने दे खुशक मौसम थवा लोकें गी राहत हासिल होई।

<><><><><><>

Hizb Militant

जम्मू-कश्मीर च हिज्ब-उल-मुजाहिदीन दे इक फरार आतंकवादी गी रियासी जिले सोयां 18 सालें मगरा गिरफ्तार कीता गेआ ऐ। साहडे संवाददाता नै दस्सेआ जे पुलस मूजब आतंकवादी अनवर अली बरे 2001 च हिज्ब-उल-मुजाहिदीन च शामिल होआ हा। हालांकि, ओहू बरे 2007 च आत्मसमर्पण मगरा अज्ञात थाहरें पर छपदा रेआ। ओहू दो आतंकी घटनाएं 5 जनवरी 2006 गी गोलीबारी दी घटना ते 7 अप्रैल 2006 गी रियासी

च ग्रेनेड हमले च शामिल हा, जिसदे च इक पुलिस अधिकारी दे पिता दी मौत होई गई  
ही ते चार होर घायल होई गए हे।

<><><><><><>

## Cricket

महिलाएं दे क्रिकेट प्रीमियर लीग च अज्जै दा मुकाबला रायल चैलेंजर्स बेंगलुरु ते मुम्बई  
इंडियन्स बश्कार बेंगलुरु च खेड्ढेआ जाग। मैच संझा साड्डे 7 बजे शुरू होग। समृति  
मंधाना हुंदी अगुवाई च आर.सी.बी दी टीम इसलै अंक तालिक च सब्भनें शा उप्पर ऐ  
कीजे उन्नै हुनै तगर सब्बै मैच जित्ते न। जिस्सलै के हरमणप्रीत कौर दी अगुवाई आहली  
मुम्बई इंडियन्स इस्सलै त्री थाहर पर ऐ।

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक  
संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर  
24 थमां 50 बरें दे बश्कार ऐ ते ओहू कठुआ जिले दा रौहने आहला ऐ, इस लेई आवेदन  
करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत  
यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड्चदा ऐ। मेदवार  
गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड्चदे  
उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10  
किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड्चदे दस्तावेजें

दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

